

jemu zdać, zo w žanym druhim měsće njemóhł svojim ryčespytnym študijam dale tak žiwy być, kaž w Lipsku. Z přeloženjom z cuzych ryčow a z korekturami so tudy žiwješe a dokelž naposledku nimale wšitke ewropiske a orientaliske ryče rozemješe, dha jemu na tajkich džělach, kiž so derje zapłaćichu, ženje njepobrachowaše. Sam za swoju wosobu jenož mało trjebaše, dokelž bě we wšěch wěcach jara spokojny. Štož zasłuži, nałožil tehodla z wjetšeho džěla na přisporjenje swojeje wulkotneje knihownje, w kotrejž měješe we wjacy hač w jenym nastupanju pokłady, kaž žana zjawna knihownja. Tež naša serbska literatura bě w njej z wjacy hač ze 400 číslami zastupjena a bjez tutymi namakachu so serbske knihi a rukopisy z najstaršeho časa, kotrež my Serbja ani w našich serbskich knihownjach njemějachmy. Tež ze wšitkich druhich słowjanskich literaturow namakachu so w njej woprawdźite žadnostki a krasne pokłady, kaž na příklad Primus Truber wot léta 1562, česke biblije z létow 1537, 1549 a kralicka biblija českich bratrow z léta 1613 a t. d. Katalog tuteje knihownje, kiž bu meje 1876 w Lipsku na přesadzowanje předawana, mjenuje přez 7000 číslow. Wón měješe tu samu za wjele tysac toleri zawěscenu a wona bě jeho jeničke zemske wjesele, a žane wopory njeběchu jemu přewulke, hdyž bě skladnosć, tu samu ze žadnymi knihami přisporić a wobohać. Serbam, kiž w Lipsku študowachu, wotewri wón tu samu rady a podpjeraše jich tež hewak po možnosći ze swojimi wědomnosćemi při jich študijach. W léce 1861 wza wón předsydstwo serbskeho towarstwa Sorabije w Lipsku na so a je so w tajkim swoim zastojnstwje přez 11 lét hač do započatka swojeje khorowatosće w léce 1872 swěru za to starał, zo su študowacy Serbja w Lipsku pod jeho nawjedowanjom a rozwučenjom swoju maćernu ryč a swoje narodne pismowstwo lěpje spóznać nawuknyli. Jako předsyda Sorabije wuda wón w léce 1867 za našu serbsku ryč wažnu knihu: „Der Brief des Jakobus. In wendischer Uebersetzung aus der Berliner Handschrift vom Jahre 1548. Leipzig bei F. A. Brockhaus.“ Tutu knižku je wón jako jubilejski dar serbskemu předařskemu towarstwu w Lipsku poswjećil a je z njej słowjanskich wučenyh na tamny dołho zabyty serbski rukopis